

蜀中廣記

卷之四

四

總校官庶吉士臣何思鈞

校對官學正臣陳木

謄錄監生臣曹錫爵

欽定四庫全書

蜀中廣記卷九十四

明 曹學佺 撰

著作記第四

子部

老子指歸

漢書嚴君平博覽亡不通依老子嚴周之指著書十餘

萬言

嚴君平註老子其文竒世多未見如云肝膽為胡越眉
目為齊楚又云生不枉神死不幽志又云天地億萬而
道王之衆靈赫赫而天王之僕者穴處而聖人王之羽
者翔虛而神鳳王之毛者蹠實而麒麟王之鱗者水居
而神龍王之介者澤處而靈龜王之百川並流而江海
王之又云言為禍匠默為害工進為妖式退為孽容嘗
鼎一臠可知其味也出丹鉛餘錄

註老子指歸十三卷

晁氏曰其章句頗與諸本不同如以曲則全章末十七字為後章首之類按唐志有嚴遵指歸四卷馮廓注指歸十三卷此本卷數與廓注同題谷神子而不顯名姓疑即廓也

三十家注老子八卷

唐岷山道士張君相集河上公嚴遵王弼何晏郭象鍾會孫登羊祜羅什盧裕劉仁會顧歡陶隱居松羅仙人裴處思杜弼節解張憑張峒成玄靜大孟小孟竇畧宋

文明褚柔劉進喜秦子晃成玄英車惠弼等注君相稱三十家而列名止二十有九蓋君相自以為一家言并數之耳君相不知何時人而謂成玄英為皇朝道士則唐天寶後人也以絕學無憂一句附絕聖棄知章末以唯之與阿別為一章與諸本不同

道德經廣義三十卷

崇文總目唐青城賜紫道士杜光庭撰以明皇注疏演其義

道德經疏節解上下各二卷

崇文總目偽蜀喬諷撰諷為諫議大夫知制誥奉詔以唐明皇注疏杜光庭義綴其要附以己意解釋之

道德經解二卷

宋隱居郭長孺撰志云不知何許人流寓入蜀遂為成都人頗知黃老吐納之學

蘇子由註老子二卷

子由調官筠州頗與學浮屠者游而有所得於是解老

子嘗曰中庸喜怒哀樂之未發謂之中發而皆中節謂之和致中和天地位焉萬物育焉此蓋佛法也六祖謂不思善不思惡則喜怒哀樂之未發也蓋中者佛法之異名而和者六度萬行之總目致中極和而天地萬物生於其間非佛法何以當之天下無二道而所以治人則異古之聖人忠信行道而不毀世法以此耳故解老子亦時有與佛法合者其曰是謂襲明以為釋氏傳燈之類東坡跋曰使戰國有此書則無商鞅韓非使漢初

有此書則孔老為一使晉宋間有此書則佛老不為二

劉巨濟注老子二卷

陽安劉涇字巨濟篤志于學文詞竒偉早登子瞻之門
號前溪子

南華經疏二卷

隋何妥棲鳳著爵里見前

南華正義

唐劍南道士文如海著宋太平興國八年成都道士任

奉古鋟諸本歲久不傳元玄學講師錢大中翻刻之吳澄序

東坡廣成子解一卷

晁氏曰蘇子瞻取莊子中黃帝問道於廣成一章為之解景迂嘗難之其序畧曰某晚玷先生薦賢中安敢與先生異論然先生許我不苟同按杜光庭有廣成子一百卷不係此書

珞球子

鬼谷先生著大峨志云山有鬼谷洞相傳先生於其中
著珞球子而上昇去通考以為即今祿命之書

無盡居士注素書一卷

晁氏曰商英稱素書凡六篇按漢書黃石公圯上授子
房世人多以三略為是蓋誤也晉亂有盜發子房塚玉
枕中獲此書商英之言世未有信之者

荀子校勘二十卷

宋廣安黎錞希聲著

揚子法言十三卷

晁氏曰漢揚雄撰晉祠部郎中李軌注雄好古學見諸子各以其知舛駁不與聖人同是非頗謬於經故人時有問雄者常用法言應之謾此以象論語號曰法言每篇復為序贊以發其大意然雄之學自得者少其言務擬聖人蘄蘄然若影之守形既鮮所發明又往往違其本指正古人所謂畫者謹毛而失貌者也

殊言十五卷 宋經籍志作方言十四卷

雄答劉歆書又勅以殊言十五卷君何由知之謹歸誠
底裏不敢違信雄少不師章句亦於五經之訓所不解
常聞先代輜軒之使奏籍之書皆藏於周秦之室及其
破也遺棄無見之者獨蜀郡有嚴君平臨邛林閭翁孺
者深好訓詁猶見輜軒之使所奏言翁孺與雄外家牽
連之親又君平過誤有以私遇少而與雄也君平財有
千言耳翁孺梗槩之法畧有翁孺往數歲死婦蜀郡掌
氏子無子而去而雄始能草文先作縣邸銘玉珥頌階

闈銘及成都城四隅銘蜀人有楊莊者為郎誦之於成
帝成帝好之以為似相如雄遂以此得外見此數者皆
都水君常見故不復奏雄為郎之歲自奏少不得學而
心好沈博絕麗之文願不受三歲之奉且休脫直事之
繇得肆心廣意以自克就有詔不可奪奉令尚書賜筆
墨錢六萬得觀書於石渠如是後一歲作繡補靈節龍
骨之銘詩三章成帝好之遂得盡意故天下上計孝廉
及內郡衛率會者雄常把三寸弱翰齎油素四尺以問

其異語歸即以鈇摘次之於槩二十七歲于今矣而語
言或交錯相反覆方論思詳悉集之燕其疑張伯松不
好雄賦頌之文然亦有以竒之常為雄道言其父及其
先君喜典訓屬雄以此篇目頗示其成者伯松曰是縣
諸日月不刊之書也又言恐雄為太玄經由鼠坻之與
牛場也如其用則實五稼飽邦民否則為抵糞棄之于
道矣而雄獻之伯松與雄獨何德慧而君與雄獨何譖
隙而當匿乎其不勞戎馬高車令人君坐幃幙之中知

絕遐異俗之語典流於昆嗣言列于漢籍誠雄心之所
志極至精之所想邁也仗聖朝遠照之明使君求此契
君之意誠雄散之會也死之日則今之榮也不敢有貳
不敢有愛少而不以行立於鄉里長而不以功顯于縣
官者訓此於帝籍但言詞情覽翰墨為士誠欲崇而就
之不可以遺不可以忘即君必欲脇之以威陵之以武
欲令入之於此此又未定未可以見今君又終之則益
死以從命也且寬假延期必不敢有愛雄之所為得使